

ների վրայ թառել: Ծարլոնը, շինծու նախադասութիւնների գորշ շարանը, անկիւնաւոր բառերի աղմուկը, հին երկաթ ծախողների այս խանութում գետեղուել է եւ ճամբաները գոցել:

Հով է՝ որդնած պտուղները վայր են թափուում:

Երեւանի նոսրիո-կայանը հանգիստ չուներ: Մեղձ երաժշտութիւնը արձանագրում է միլիոնաւոր բառեր: Հեռադիրները ձորեխի նման թառում են գանկերի տակ, մտնում են կաշուէ ծրարները, ջրայնացած մատերի տակ դողդողում են, ու յանկարծ դուրս են պրծնում, յարձակում են քաղաքների եւ դիւղերի վրայ, ծալում, ձեռքէ ձեռք անցնում, մաշուում եւ վերջապէս շունչերը կտրած պառկում են դրասնեակների անկիւնում:

Լենինը մեռել ա, եւ ամէն մարդ ոտքի է կանգնել:

Ականջները սրուել են, սրտերը ուռել, յոյսերը արթնցել:

— Մեռե՛լ ա...

— Դէ հիմա՝ հը՛:

— Հը՞ը՞... Աստուա՛ծ տայ:

Ծածուկ օդի են խմում, քթի տակ երգ մրմուռում:

\* \* \*

Իսկ այնտեղ, հիւսիսային ձիւների մէջ, Մոսկուան փուկ է իր թեւերը:

Կարմիր հրապարակը պտոյտ է գալիս: Կրեմլինը թաղուել է մի անյայտ աստղի տակ: Փողոցները մէկը միւսի դէմ են բախուում: Ձիւնը ինքնաշարժերի տակ սրնթաց սահնակի պէս վազում է: Սուգը գլխարկը թեքել է եւ սեւ ձիւ սանձերը պինդ քաշել:

Գնում են, գնում են ամբոխները, գլուխները բաց, վիզերը դուրս հանած, լուսօրէն անյայտ մի ճակատադիր դիմաւորելու համար:

Ձիւնը: Ծփում են կարմիր դրօշակները, սողում է սեւ ամբոխը:

Եկեղեցիների ոսկեզօծ գմբէթների շուրջը մառախուղը պտոյտ է գալիս, մինչ գանդակատունները յամր հնչում են դէպի երկինք: Դէպի բեւեռային սառած այն հայելին, ուր քաղաքը եւ ամբոխը արտացոլում են, աչտաբակի վրայից առած շարժանկարի նման, եւ

չղարշների տակ, ծփուն ստուերների վերածուում:

Մահը, եկաթէ կօշիկներով, անցնում է Ռուսաստանի վրայից:

Անցնում է ձիւնապատ դաշտերը եւ ոտքը դարնում է գետին: Նրան պատասխանում են Վօլգան եւ Դնեպրը: Սերաստօպոլի ափերին Սեւ Ծովը ոռնում է: Գիւղերի տանիքների վրայ հովը յուսահատ բազուկները վայր է նետում ու պատռած կոկորդով ծխնելոյցների կատարին երգում:

Ամէն կողմից՝ Սիբերիայից մինչեւ Կովկաս, Ղրիմից մինչեւ Թուրքեստան,՝ ահաւոր ձայներ, խուլօրէն դղրդում են, մեծաքանակ ձիւները վեր են բարձրանում, լեռների շուրջը վայում են, դաշտերը ծեծում են, մտնում քաղաքների մէջ ու քանդուած տունների անկիւններում կմախքների նման պառկում:

Մահը արաղացնում է իր քայլը:

Խելագարուած այս աշխարհի միջից վազում է երերալով, վայր է ընկնում, մատերը կոտրուում ու ոտքերը մխրձում ձիւնի մէջ եւ կանգ առնում սարսափած:

\* \* \*

Բարձրագոյն հրամանով, Լենինի յուղարկաւորութիւնը պիտի կատարուի բոլոր քաղաքներում եւ դիւղերում նոյն ժամին:

Ժամը 4 1/2-ին գործարանները՝ Միութեան երկրներում եւ դուրսը՝ պիտի սուլեն նոյն ժամին:

50,000 կարմիր դադաղներ պիտի անցնեն Թնդանօթներով շրջապատուած: Զօրքերը պիտի կրակեն եւ բորոզանները ձայնեն:

\* \* \*

Արովեան փողոցի վերի կողմից, պարապ դադաղը երերում է կոմիսարների ուսերի վրայ:

Ձինուորական նուագախումբը Ծօպէնի թոքերն է պատռում:

Թնդանօթներ:

Սայլերի վրայ դարմացած գիւղացիներ են նստել:

Երաժշտական Ստուդիան Մոցարտ է երգում: Պարապ դադաղը, սեւերով ծածկուած ամբիոնի առջեւն են դնում եւ չորս ժամ ճառ են ասում: